

Hali ya Matumaini na Uchangamfu

Furahini katika Bwana siku zote; tena nasema, Furahini.—Wafilipi 4:4.

Wakristo wamezawadiwa furaha ya kukusanya miale ya nuru ya milele kutoka kwenye kiti cha enzi cha utukufu na kuakisi miale hii sio tu njiani mwao, bali kwenye njia za wale ambao wanashirikiana nao. Kwa kuongea maneno ya matumaini na ya kutia moyo, kwa sifa ya shukrani na shangwe kuu, wanaweza kujitahidi kuwafanya kuwa bora wale wanaowazunguka, kuwainua, kuwaelekeza mbinguni na kwenye utukufu, na kuwaongoza kutafuta, zaidi ya mambo yote, uthabiti wa milele, urithi wa uzima wa milele na utajiri usioharibika.

“Furahini katika Bwana siku zote,” anasema mtume; “tena nasema furahini.” Popote tunapokwenda, tunapaswa kuchukua pamoja nasi angahewa ya Matumaini na Uchangamfu; kisha wale walio nje ya Kristo Yesu wataona mvuto katika dini tunayowashuhudia, wasioamini wataona uthabiti wa imani yetu. Tunahitaji kuwa na mtazamo dhahiri zaidi wa mbinguni, mahali ambapo mambo yote ni mazuri kupindukia. Tunahitaji kujua zaidi juu ya ukamilifu wa tumaini lenye Baraka. Ikiwa tutadumu “kufurahi kwa tumaini,” tutaweza kuongea maneno ya kutia moyo kwa wale tunaokutana nao. “Neno linenwalo wakati wa kufaa ni jema kama nini!” Watu wanaangamia kwa kukosekana kwa jitihada binafsi.

Si tu katika ushirika wetu wa kila siku na waaminio na wasioamini ndipo tunapopaswa kumtukuza Mungu bali pia kwa kuzungumza wakati wote kwa maneno ya shukrani na furaha. Kama Wakristo tunashauriwa kutoacha kukusanyika pamoja, kwa ajili ya burudiko letu na kutoa faraja tuliyoipokea. Katika mikutano hii, inayofanyika kila juma, tunapaswa kujikita katika wema na rehema nyingi za Mungu, na juu ya uweza Wake wa kuokoa kutoka dhambini. Tunapaswa kushuhudia kwamba huduma ya Mungu ni njema kwa mwonekano, mwenendo, maneno na kwa tabia. Kwa kufanya hivyo tunatangaza kwamba “Sheria ya Bwana ni kamilifu, huiburudisha nafsi.”

Mikutano yetu ya maombi na ya kijamii inapaswa kuwa vipindi vya kutoa msaada maalum na kutia moyo. Kila mtu anayo kazi ya kufanya ili kuifanya mikutano hii kuwa ya kuvutia na ya kunufaisha kadiri iwezekanavyo. Hili linaweza kufanyika vizuri kwa kuwa na uzoefu mpya kila siku katika mambo ya Mungu na kwa kutokusita kushuhudia upendo Wake katika mikusanyiko ya watu Wake. Ikiwa hatutaruhusu giza wala mashaka kuingia moyoni mwetu, havitaonekana katika mikutano yenu pia....

Kwa fumbo na utukufu wa msalaba tunaweza kukadiria thamani ya mwanadamu na kisha tutaona na kuhisi umuhimu wa kufanya kazi kwa ajili ya wanadamu wenzetu, ili kwamba waweze kuinuliwa hadi kwenye kiti cha enzi cha Mungu
(*The Southern Watchman, Machi, 7, 1905*).